



Assam tensa tamajungba akümtsü akok

Dimapur, Chiteni/July 28

(TYO): Assam sorkari asüng (29/07/2025) nungi tenzüka Golaghat district nung Silonijan anasa Sarupathar sub-division kübok Uriamghat i.e. Rengma Reserve Forest (RF) nung yim kümteta alirtem agientsü atema "eviction drive" tesashi ka tenzüksü renemtar ta angazüker.

Rengma RF ya DAB küboki aiter. Ajisüaka Assam sorkari par li ta kibur akumer aser iba RF nung alirtem ya ozüing alema yimküma alirtem, illegal migrants, lir ta aitsür. Item nisungtemi government Reserved Forest raksatsür

yangji yim küma alir ta Assam government-i ashir.

Kasa mapang yangji alir, Rengma Naga nungertemi parnok aliba li ya alemli nungi par indang ta ashir aser par li yutsür maotsü ta metetdaksüogo.

Ano, osang kar ajanga ashiba agi, iba eviction drive anema nokdaksü atema NSCN telok kati renemdagi.

Iba jagi asüng nungi Assam aser Nagaland artsülen tensa tamajungba akümtsü amai lir.

Anungji, Assam nung, talisa, Jorhat aser Golaghat district tem ajanga nüburtem mesenzüi ata tajungba asütsü ta osang kar ajanga ashir.

Illegal immigrants tebilemtsü ya arok indang lir

Dimapur, Chiteni/July 28

(TYO): Assam sorkari illegal immigrants tem meindokba maparen tesashiba akumba ajanga Nagaland telungi illegal Bangladeshi immigrants (IBIs) aittsü khuret lemsateptsü asoshi Deputy Commissioner, Dimapur, Dr. Tinojongshi Chang, NCS-i civil society tem, police aser local bodies tem den senden ka Hombarnü mena liasü.

Iba senden nung police, East Dimapur Town Council, GB Union Dimapur (Sadar), Dimapur District GB Association, DCCI, DUCCF, DNSU, aser Dimapur district kübok village councils nungi teshimtet nisungtem dena liasü.

Senden temer osangbener den jembidang, DC Dimapur-i Dimapur indang arütsü ajunga administration aser police temi mittsü tasak, anungji councils, GBs aser civil society

organisations nungi amalitep akatsü kanga tongtipang lir ta ashi.

Metokmeperi alibatem jangjatepa sorkari inyakba nung tashi itshitsü nüngdakba jangjatsü asoshi senden ya ayongzük aser senden nung adener nungi lemsatepba onük aika sorkar dangi yokogo, ta pai ashi.

Inner Line Permit (ILP) guarantor system indang osangbeneri asüngdangba mapang, mezüngbo guarantor kati nisung ter tashi atema kuli agütsütettsü shia liasü, saka state cabinet nung densema jembishinü balala akaba sülen ozüing tera yanglushiogo, ta pai ashi.

Tangbo pei employees atema registered institutions mesüra firms ya guarantors ama sütettsü ta ashi.

Tesem balala nungi aitba lenmangtem indang jembidang,

police tem tali yoksema lir aser ammag-sangwa metitemi anüker, aser Dobashi tem densema administrative ketdangsür temi item tesemtem semdang, ta pai ashi.

Ajisüaka administration aser police kisüingi tesem ajakbo mawajemtsü makoker, anungji village councils, colony councils, DUCCF, GBs aser dangar tem teyari nüngdaker, ta pai ashi.

"Ibai sorkar kisüing tebilemtsü masü saka arok tebilemtsü lir," ta pai ashi.

Colony kar nungbo entry routes tem mita ataba maparen tenzükogo aser senden nung tebilemba lemsatepdang check gates tasen amenoktsü nüngdak ta jembia liasü ta DC Dimapur ajanga ashi.

Pai Karbi Anglong indang deputy commissioner den jembioigo aser district ana angatettepa inyaktar ta pai metetdaksü.

MP S. Supongmeren Jamir-i state tebilemtsü lemsatep



Dimapur, Chiteni/July 28

(TYO): Mapang talangka nungi Nagaland aser Northeast region nung ki o jen aser energy tsütsü timtem aliba bentettsü mechi, Nagaland nungi Parliament nung Lok Sabha züngsem S. Supongmeren Jamir-i July 27 & 28, 2025 anogotem New Delhi nung Union minister ana ajurua liasü.

Nagaland Pradesh Congress Committee (NPCC) sangdong ka ajanga ashiba agi, July 27 nü MP (Lok Sabha) S. Supongmeren Jamir-i Union Minister for Development of North Eastern Region (DoNER) Jyotiraditya Scindia ajurua tongtipang ki o jen project tem renemtsü menuba indang lemsatepa liasü.

Tongtipangsa Dimapur aser Kohima tsüngta 4-lane highway projects kanga nüshia inyakba indang lemsatep, koba September 28, 2025 tashinung renemtsü mapang apulokja lir. MP Supongmeren-i Union minister dang iba project mapang shidak nung renemdaksütsü asoshi on-ground verification atema high-level committee ka yoktsü ajungshia liasü.

Pai region nung mobile connectivity majungba tebilemtsüa lemsatep aser takok anguba osang aser asangsang

tensa tia meputeper ta ashi. Ketdangsür temi 100% coverage lir ta shiaka network maliba yimtsüng aika Nagaland nung lir.

Pai mobile towers merenemi aliba, BSNL indang ki o jen agi meperiba indanga tuteta ashi.

Maneni July 28 nü Union Minister for New and Renewable Energy, Consumer Affairs, and Food & Public Distribution, Pralhad Joshi nem MP Supongmeren-i tezüluba ka nung takhangba kar agüja liasü.

Hydropower development atema central funding tejangja maliba aser off-grid solar programme ajungbena anenba indang pai ashi.

Yimdak yimtsüng nung energy nüngdakba peritsütsü asoshi solar streetlights, home lighting systems aser solar power packs tanaben tenzüksütsü pai ayongzüka liasü.

Tenem-tekong nung wind turbine schemes tila amenoktsü aser transmission infrastructure tsütsü metokmeperi aliba awajemtsü asoshi 'Green Energy Corridor' ka yanglutsü indanga ayongzüka liasü.

Pai Centre dang subsidies, GST waiver aser tax holidays ajanga private sector temi shilem agitsü asoshi ajungmesotsü ashi.

Kohima nung World Hepatitis Day 2025 amung

Dimapur, Chiteni/July 28

(TYO): Directorate of Health and Family Welfare, Kohima nung July 28, 2025 nü alima rangben omen 'Hepatitis - Lets Break it Down' nung ajemdaker World Hepatitis Day 2025 munga liasü.

Principal Director, Health & Family Welfare, Dr. Merenila Senlem-i omen nung ajemdaker World Hepatitis Day amungba temaitsü rateta ashi aser iba anogo ya ajanga asenoki hepatitis tashidak azüoktsü merangba ulushitsü maongka angur ta ashi.

Viral hepatitis indang awareness agütsütsü asoshi küm shia July 28 nü World Hepatitis Day ya amunger, ta lai ashi. Hepatitis ya temesen meroba timtem ka lir, koba ajaga temesen nung tashidak tamajung aser temesen cancer kumdaksür.

Omen ajanga hepatitis samatsüba aser temesen cances nungi jenbua aliba nung tenokdangba agütsüba senotsü, loktiliba aser tetsükdaksü balala raksatsütsü ayongzüker aser vaccination, safe injection practices, tendangba aser anepaluba tali tongmelangba aser tajungba kumdaksüba sayur.

National Health Program ka ama asen linük nung 2018 küm National Viral Hepatitis Control Program tenzüker aser Nagaland state nunga NVHCP ya 2019

nung tenzüker, aser iba sülen NHM Nagaland ajanga 2030 tashinung viral hepatitis samatsü SDG nükjidong aliba den lirumedema tanen makai inyaka arur, ta lai ashi.

Mission Director, National Health Mission, Dr. Avile Zao ajanga o tatsüka jembidang, 2025 omen yagi ola madoki aliba, maksü ama bilemba aser hepatitis menatepa aoba süngzü rakdangtsü ayongzüker, ta ashi.

Alima nung hepatitis yagi nisung million aika meneper, saka aikati iba tashidak nung lendong aliba, menatepba yimya aser anepalutsü memeteti lir, ta lai ashi.

Lai hepatitis ya kechi, koma menatepa aor, asen temang nung koma kongshir aser Nagaland nung angati tendangba, anepaluba aser mozü agütsüba densema mera balala agiba indang rateta ashi.

Hepatitis ya temesen moroba timtem ka lir, koba viral infections agi tali adokdaksür, saka toxins, autoimmune diseases aser danga yimyatem nungia adoker, ta lai ashi.

Viral hepatitis ta tongtipang tabu pongu lir - A, B, C, D aser E aser iba tashidak yagi yimra ama adokdaksür, jaundice, temang zükla aoba, tebok nung tashitsü atuba aser kanga sashia kongshiba nung temesen raksatsür, cirrhosis aser cancer adokdaksür.

Hepatitis A aser B atema

vaccine lir, hepatitis B aser C menateba aoba nungi ajemtsü asoshi shi nung medemba kumdangtsüla, hepatitis A aser E nungi jenbua alitsü asoshi chiyongtsü aser tzü tamajung mamshitsüla, hepatitis B, C aser D menatepba aoba nungi kumzüktsü asoshi ajem (needles) lemsatepa mamshitsüla aser hepatitis A aser E prokshia aoba nokdangtsü asoshi chiyongtsü kanga kumdanga amshitsüla, ta lai rateta ashi.

Nagaland nung 2024-25 nung Hepatitis B infections shilem 2.4, Hepatitis C infection shilem 4.01, mashisa aliba tetsür dak hepatitis B shilem 0.8 lir ta ashi.

Hepatitis B & C aser mashisa tetsür dak Hepatitis B ya Dimapur nung timba lir. Health & wellness Centres densema sorkar indang mozüki ajunga nung Hepatitis B & C tendangba lir, District Hospitals ajunga nung free viral load testing of hepatitis B & C lir, Hepatitis B & C angati treatment lir, aser kinü tanur ajunga nem Routine Immunization ajanga Hepatitis B vaccine angati agütsür, ta ashi.

NVHCP ajanga Hepatitis B aliba tetsüi asoba kinü tanur nem Hepatitis B Immunoglobulin angati agütsür, anungji mashisa aliba tetsür temi Hepatitis B tendangtsüla, ta Dr. Avile Zao-isa ayongzüker.

MSTK-i jenjang temabai atuba ketdangsürtem tushi



Dimapur, Chiteni/July 28 (TYO): Mangmetong Senso Telongjen Kohima-i, I. Moatemjen Jamir aser Dr. B.M. Sunep na Printing & Stationery aser Animal Husbandry & Veterinary Services nung Head of Departments akümba atema tenüngsang agütsüba sentong ka ayongzüka agiogo. Iba sentong ya Advisor, IPR & Soil and Water Conservation Imkong L. Imchen'er kidang July 26 nü agia liasü

Sentong nung o jembiba mapang Director, Printing & Stationery, I. Moatemjen Jamir-i, pa Director jenjang tongtetba ya tulusang Tsüngrem temaotsü lir ta ashiba den, Director ka ama inyakba mapang pai nüburtem tenzüksü aser department ajungkettsü atema takok tashi inyaksü ta shia liasü. Paisa, par kibong aser pa nongita yarirtem dang kanga pelaba lemsatep.

Director, Animal Husbandry & Veterinary Services, Dr. B.M. Sunep-i pa mapa indang lemsatepba mapang lanurtem ayongzüka, tanü asenok

postmodern era ka nung alir, kong technology agi masü saka philosophy agi alima anir, kong asenoki asen sasa dak, asen sempet dak, asen mapa dak tamang akatsüla, ta ashi. Paisa, parnok dang tamakok, timtem aser tetsüdahtsü ajangshiba mapang Tsüngrem bushitsüla, kechiyong nisung ajak taküm nung nükjidong ka lir aso aser aji angatetsü nüngdaker, ta ashi. Paisa, tsürapurtem dang tanurtem nem parnok kechi züngner aji shimdaksütsü aser parnok temulung süa inyaksü atema career shimdaksütsü ayongzüka liasü.

Sentong nungsa Advisor, IPR & Soil and Water Conservation, Imkong L. Imchen-i, HoD ana nem tenüngsang agütsü aser iba temoatsü atema pela alitsü ajungshiba den bendang agüja nüburtem tenzüksü ayongzüka liasü.

O jembiba mapangsa Advisor-i 1955 küm Naga nung yimden yimsüsüba asoshi raraba mapang Mangmetong yimtsüng nung kaketsütsü bushiba indang

lemsatep. Iba mapang Mangmetong nungertem sorkar mapa atema masü saka yimden yimsüsüba nungang tejangraba liasü aser school-i oya aliba tanurtem school-i aotsü memela aser tashi mangara senchi chia liasü. Ajisüaka iba inyakyim ya 1960s nungi melenshi aser iba sülen Mangmetong yimtsüng nungi shisashir aser officer, bureaucrats aser HoD tem aika anitetogo aser iba atema asenok nema adangtsüla ta ashi.

Sentong nung Pastor, Nagaland Christian Revival Church, Ao Kohima, Toshi Imchen-i Tsüngrem o jembiba mapang, pei taküm Tsüngrem dak amendaksü, koba ajanga linük ajungkettsü aser nüburtem tejakdangi anir aoba den Tsüngrem sentsüwangsh - idaktsütsü ta ashi.

Sentong ya Mangmetong Senso Telongjen Kohima tir N. Meren Longchar lenisüba nung agi aser Timothy Imchen-i tepela o jembiba liasü. Sentong nungsa Mangmetonglar Telongjen Kohima-i ken tajung ka tena liasü.

NDPP 26 Aonglenden A/C pur 2024-2027 kümsük asoshi ketdangsür shimogo

Ungma, 28 July (TYO): Nationalist Democratic Progressive Party (NDPP) 26 Aonglenden Assembly Constituency pur 2024-2027 kümsük asoshi ketdangpur aniokba sentong ka yangi Arok Sabang, Ungma yim dak meraketa agiogo.

Ketdangpur aniokba aser tenangzüka agiba mapaji NDPP Mokokchung Region President, Repameren-i ketdang asü. Tanü aniokertemji - 26 Aonglenden Assembly Constituency ketdangpur den Women Organization aser Youth Organization nungi densema menden balala nung ketdangpur ajak senteper parnok 73 shimogo. Iba den 26 Aonglenden A/C kübok-Ungma yim, Kúpza yim, Settsü yim, Dilong ward, Sangtemla ward, Arkong ward, aser Marepkong ward, item unit shia nung menden balala nung ketdangpur ajak senteper 370 shimogo.

Tanü iba sentong nung 26 Aonglenden A/C nungi adoksang Nagaland Legislative Assembly Speaker Sharingain Longkumer-i jembidang, 26 Aonglenden constituency ya lenir agütsütetba A/C ka lir, 2019 bye-election nungi tenzüka yaküm agiba ULB election agiba tashi nung noklang nung noklang shilem takok ngutetba asoshi constituency nüburtem

dang pelaba metetdaksü.

Tesüiba mapangbo inyakyim ajak tongmelang nung dang inyaka aru, saka tanüba yamaji masü. Joko inyakyim ajak melenshia aor, anungji, tensa den sütepa asenoka inyakyim melenshia aotsüba kanga nüngdaker, ta pai party pur ajungshia liasü.

India Prime Minister-i 2047 tashi nung India ya tejakleni aoba linük ka 'Viksit Bharat' (Developed India) kümdaksütsü sangdongogo. Iba mangdangi India kübok aliba state ajak renlok nung dang ataloktet. Anungji, sarkar, political jenjang balala nungi tenzüka yim dak yimtsüng tashi nung sentongren aser mapalem tajung yur mapa ajak tajitetsü maket ochishia inyaksü nüngdaker, ta ashi.

""Viksit Bharat' ataloktsü asoshi asen constituency sangera koma shilem aginung ajungtsü mesüra koba dak rangloker inyaksü? Ibai arok khuret lir, anungji, nenok nungi shisatsü aginür," ta paisa mepishia ashi. Iba dak sentakba nung asenoka kechi mangdang ayu nung ajungtsü ta asüba onük nung shisatokden akatsü paisa shiogo.

Terenlok mapa teti shia inyaka aruba mapa ka dang masü, saka mapa tasen

yangerteta koba ajanga nübur ajangzüksü mesüra tejakleni aotsü, item dak rangloker inyaksü asoshi paisa ajungshi. Iba den party tenzüker tsüngta amalitep tali tajungba alitsü asoshi paisa shisem.

Paisa terenlok mapa teinyakdak kar lemsatepdang, Ungma lushi Rempukong nung Astroturf football ground mezüngren temogo, tanaburenji ita 10 shi nung tembangtsü, ta ashi. Iba den ano Rempukong nungsa tayimtsü anendak helipad ka yanglu tang asamayangdaki, Mokokchung Municipal Council atema cold storage ka renemtsüogo (3.5 metric tonnes capacity) saka ano melapoki lir. Horticulture department ajanga Ungma yim ya Horticulture Model Villages (HMTVs) küboki aittsü sangdonga lir, iba asoshi Minister, Salhoutuonuo Kruse dang pelar. Ano 26 Aonglenden A/C sangeri yakbang sür alima tzü mopung kümsüka aser wazüka ayutsü asoshi mapatong ka inyaksü tebilemba lir, ta paisa metetdaksü. 15th August nü Nagaland Chief Minister-i mapa inyaksü maongka lapokba (employment) dak sentakba nung osang tajung kar sangoktsütsü imlar, ta paisa shisem.

Iba sentong nung NDPP

Principal AG office-i metetdaksür

Dimapur, Chiteni/July 28 (TYO): Principal Accountant General (A&E), Nagaland office sangdong ka ajanga Nagaland sorkar kübok Heads of Department ajak dang 2024-25 küm atema Annual GPF Statements (Hard Copy) sangdongba metetdaksüogo.

Iba dak sendakba nung Heads of Department ajak dang Nodal Officer tem den Head of Department indang signature aser seal keter temelaba shit bener lemezükja aliba anogo Annual GPF Statements (Hard Copy) ya agizüktsü metetdaksüogo.

Date	Series
29-07-2025	AIS/CPF/STY/JAIL/FOR
30-07-2025	IND/MEDL/VETY/AGRI
31-07-2025	MISC/POL/EDN/CW/GA

MISC, POL, EDN, CW aser GA series dak sendakba nung statement ya Director of Treasuries & Accounts, DGP Office, Director of School Education, Commissioner of Nagaland, C.E. (PWD) R& B aser Commissioner's Office, Kohima nem agütsütsü. Temalen shisema aliba series küboki aita Department tem dang item office tem nungi agizüktsü metetdaksüogo.

Maneni tang technical tsütsü ken o mebeneteti aliba bentetba sülen Online GPF system inyaksangshi tenzüksü.

Tebilemstü mesüra tetsükdaksü kar danga lir teküboklen agüja aliba ketdangsürtem den office mapang tongteprateptsü metetdaksüogo.

Sl. No.	Name of the Official & Designation	Mobile number
1	KatibaLongchar, Asst. Accounts Officer	#9089630698
2	Kapminthang, Asst. Accounts Officer	#9089278188
3	Arup Roy, Sr. Accounts Officer	#9436601437

GPF dak sendakba tebilemstütem ya agaenagaland@cag.gov.in mesüra Sr. Deputy Accountant General (A&E) Azhar Jamal dangi jamala@cag.gov.in ta email ajanga zülutetsü, ta kasa sangdong ajanga metetdaksü.

Ao Senden-i tekümdangtsü metetdaksü

Mokokchung, Chiteni/July 28 (TYO): Assam Government-i Illegal Bangladeshi Immigrant (IBI) aridokba maparen nung IBI temji asen limai aita jenoktsü lenmang aika aliba ajiteta ibaji noktangtsü asoshi Aosünak abener ajaki meteta alitsü aser

tekümdangtsü sangdonger:

1. District Administration, Police Department, Ao Senden aser AKM telungjem senden Chiteni (July) 25, 2025 anogo nung Inner Line Permit (ILP) shitak malir nisung shinga artsü atena maitdaksütsü renemba ama mapa küma inyaka aodang ajaki mitkarsüa amalitep lia nungita yaritsüla. 2. Iba mitka mapa ya Mokokchung District Administration aser Police-i asen lima wazüka aser kümsüka ayutsü asoshi inyaker asünung ajaki tangatetba tajung agi amalitep alitsüla.

3. Yimajak nung talisa artsü len alir yimsüsürtem aser nüburtem ajak IBI tem asen limai maitdaksütsü asoshi kümdanga mitkarsüa nübu tasen senzusenpongba jangjaa metetra tekarakba nung Police nem agütsütsüla.

4. ILP yanglutsü asoshiAosünak abener shibai tsümar asoshi guarantor südir kuli tejangja lia dang sütsütsüla.

Nagaland nungi Working President N. Bendang Jamir, Mokokchung Region nungi Sr. Vice President & 26 Aonglenden In-charge Lipokzülu Longkumer, Mokokchung Municipal Council Chairman Imkongchuba A, 26 Aonglenden A/C president Nungsangmeren Lkr, 26 Aonglenden A/C vice president Kikumsungba Jamir, 26 Aonglenden A/C general secretary M Sütsüng Jamir aser Women Org. Ungma Unit President Alila parnok shilem balala agia liasü.

Mejangjaba tasü mang ka nguteta lir

Dimapur, Chiteni/July 28 (TYO): July 28 nü mejangjaba tebur non-local (arishi küm 35 nungi 40 tsüngda asütsü) ka tasü mang Khatkhathi tsütsülen FOB-1 aser Flyover apu na tsüngda sür lia ngutetogo. Pa ya train agi menüngset asütsü ta bilemer.

Asüsang tekolak ya pa tekong nungi pilar liasü. Pe tekolak ya train lenmang temalen aser pa temang ya train lenmang nung liasü.

Osang angazükba dak ajemdaker duty party-i bushisüngdang asü aser temulung malemstüsa inyakyim

kecha mongutet. Temzüng ozüng dak sendakba nung tinyaktsü maparen ajak tembanga inyakba sülen tasü mang ya PM examination/ identification atema District Hospital Dimapur Morgue-i benerogo. Asüsang yagi blue t-shirt, coffee sentsü half pant, waist belt tanak aser slipper/chappal ka semer liasü.

Ken o dak sendakba nung asüsanger kinunger, adianu aser medemertem dang Officer-in-Charge, GRPS, Dimapur (Mobile No. 7085055021) den tongteprateptsü mepeshia metetdaksüogo.



July 28, 2025 nü New Delhi nung Parliament kima Congress Tir Mallikarjun Kharge, Lok Sabha nung opposition lenir Rahul Gandhi, party MP Sonia Gandhi, MP Priyanka Gandhi Vadra, DMK MP Kanimozhi Karunanidhi, Samajwadi Party MP Akhilesh Yadav, TMC MP Derek O'Brien aser INDIA teloktep nung MP temi Bihar nung Special Intensive Revision (SIR) anema longkak aitung tangokba noksa nung angur.

SIR nung Aadhaar aser EPIC züngoktsü mepishi

New Delhi, July 28 (Agencies): Hombarnü Supreme Court-i Bihar nung Election Commission-i benokba Special Intensive Revision (SIR) anema agüja aliba ken otem angadangogo.

Hombarnü item ken o angadangba mapang nung Justice Surya Kant-i, SIR nokdangtsü atema mepishiba ken o mangadangtsü, ajisüaka SIR anema benokba temepishiba ken otem angadangtsü, ta metetdaksü.

Ken o angadangba mapang nung temepishiba ken o benokertemi, tamalen Supreme Court-i Election Commission dang electoral roll atema maitsü jangjatsü asoshi Aadhaar, Elector's Photo Identity Card (EPIC) aser ration cards agitsüla, ta asüngdangba ama Election Commission-i meinyak, ta metetdaksü.

Election Commission atema ken o jembitsür Rakesh Dwivedi-i, "Ration cards amshitsüji tasak. EPIC number ji maitsü kuli ama mamshitetsü, kechiyong tang electoral roll revision ya asentenshir tasen tenzükbä maparen ka lir," ta ashi.

Justice Joymalya Bagchi-i, tang SIR atema EC-i agizükba documents 11 nungjagi document ka kija agi teperi masü, ta süra kechiba Aadhaar aser EPIC cards bo züngdoker?, ta asüngdang. EC dang maneni Aadhaar aser EPIC nata züngoktsü

Pahalgam amaktsü atema asalentong yanglusang khasetogo

New Delhi, July 28 (Agencies): Parliament nung Operation Sindoor atema o entep tenzükbä anogo nung taküm April ita nung Pahalgam amaktsü atema asalentong yanglusang security sepaitemi khasetogo.

Hombarnü Jammu & Kashmir kübok Dachigam anasa Harwan arem nung security sepaitem den khatepba mapang nung kiralongrar asem khaset, aser par asem rongnung katibo April 22 nü Pahalgam amakba nung shilem agia lir, ta osang ka ajanga metetdaksü.

Sepaitemi khasetba kiralongrartem rongnung Lashkar-e-Taiba (LeT) telok nung züngsem Suleman maitsü

jangjaogo aser pa ya Pahalgam amaktsü atema asalentong yanglusang lir.

Operation Mahadev kübok sepaitemi kiralongrartem mita aoba mapang nung kiralongrar asemji khaset; tanünga anaji Abu Hamza aser Yasir na lir ta jangjaogo.

Srinagar nung amenoka aliba Chinar Corps-i X ajanga, "Khatepba mapang nung kiralongrar asem khasetogo. Maneni kiralongrartem mita odar," ta metetdaksü.

Army, CRPF aser Jammu & Kashmir Police longjemer kiralongrartem mita aoba mapang nung par asem khaset.

Taküm April 22 nü

AXIS BANK

AXIS Bank Ltd

A.C.Market, 4th Floor,1, Shakespeare Sarani, Kolkata- 700071

Public Notice for – E-Auction of pledged assets being Gold

Talisa sen apurtem aser public dang iba osang sangdonger, Axis Bank-i tsünglanglen shia aliba Branch nung tsünglanglen aliba accounts nung hon agi yangluba osettem public auction asütsü. Tsünglanglen shia aliba sen apurtemi security atema Bank nem gold ornaments agüja ("Gold Loan Facility") Axis Bank Limited dang nungi senotsü agia liasü. Sen apurtem/Guarantors dang Gold loan facility agiba sentsüh agüjang ta Demand Notice agüja liasü. Sen apurtem/Guarantors-i sentsühji magütsüet nungji bank-i item hon agi yangluba osettemji e-auction ajanga ayoktsüsa akümer, talisa tsünglanglen shia aliba 'schedule of property' nung alibatem ayoktsü. 28-04-2025 (anogo nung) nikongdang 12.30 nungi nikongdang 3.30 (e-auction mapang) ayoktsü aser ibaji "Kong koma ali", "Koma lidir yamaji" aser "Yangji aliba ajak" aser "No Recourse Basis" nung ayoktsü. Sen apurtem aser sentsüh osang tejangja:

Branch Name	Customer Name	Loan A/c No.	Amount Outstanding	Date of Demand Notice	Gross Weight Grams	Net Weight Grams
LHOMITHI BAZAR NL	KIESAMDING LUNG	XXXXXXXXXXXX5547	510477	3-Apr-25	101.200	97.800
DIMAPUR [NL]	ALANGANKIT KUMAR	XXXXXXXXXXXX0263	143594	30-Jan-25	41.000	39.600
DIMAPUR [NL]	PINKEY DUTTA	XXXXXXXXXXXX7337	195491	28-Aug-24	39.300	38.000
DIMAPUR [NL]	PINKEY DUTTA	XXXXXXXXXXXX1385	73210	27 Sep 24	19.000	16.500

Axis Bank Ltd. has the authority to remove account/change the auction date without any prior notice. Auction will be held online <https://gold.samil.in> (website of online vendor) between 12.30 pm-3.30pm (time). For detailed Terms and conditions, please log into given website <https://gold.samil.in> (website of online vendor)

Date: 29.07.2025 Place: KolkataAuthorized Officer, Axis Bank LTD

Operation Sindoor mapang Modi aser Trump na mejembi: Jaishankar

New Delhi, Chiteni/July 28 (Agencies): Hombarnü Parliament nung kiralongrartemi Pahalgam amakba aser Operation Sindoor indang o entepba mapang nung External Affairs Minister, S. Jaishankar-i Operation Sindoor mapang nung Ato kilonser Narendra Modi aser US Tir, Trump na phone ajanga mejembi, ta metetdaksü.

Jaishankar-i, April 22 nungi June 17 tsünga Ato kilonser Narendra Modi aser US Tir, Donald Trump na tsünga mejembi, ta metetdaksü.

Trump-i pai tiyongtsüi ia jembiba ajanga nuclear kidanger ana (India aser Pakistan) tsünga rara anena liasü, ta jembia liasü.

Lok Sabha nung opposition-i asüngdangbatem langzüdang Jaishankar-i, "Ni onük ana jangjajangja metetdaksüner. Mezüngbuba nung United States den jembiba mapang nung shishilembaba onük aser sepaitem raraba na tsünga tesendaktep kecha maliasü. Tanabuba nung, tensa majungba

mapang nung Ato kilonser Modi aser Tir Trump na tsünga phone ajanga mejembi- April 22 nü Trump-i call süa tejashi lemsatepba mapang nunga mejembi, mesüra June 17 tashi nung mejembi, iba mapang nungji pai ano call süa liasü aser idangji Ato kilonser Canada nung liasü," ta metetdaksü.

Jaishankar-isa iba maongka agia opposition aija, "Nenok sorkar nung aliba mapang nunga iba ama telemtetba agia inyaker asü?" ta asüngdang.

Paisa, "Operation Sindoor kübok India nunger nükjidongji tejangja liasü. Onoki kiralongrartem aser Pakistan nem osang tesashi ka metetdaksünüa liasü- maneni kiralongrabaji onoki magizüktettsü ta parnok nem metetdaksü. May 7 anepdang iba osangji jangjajangja sangoktsüogo," ta metetdaksü.

Taküm April 22 nü kiralongrartemi Pahalgam amakba sülen May 7 nü India-i Operation Sindoor kübok Pakistan aser Pakistan occupied Kashmir nung kiralongrar camp 9 amak.

Nun ana chioktsü Congress-i akhanger



New Delhi, July 28 (Agencies): Hombarnü Congress lenirtem- Rahul Gandhi aser Priyanka Gandhi Vadra nati Chhattisgarh nung Kerala tsür nun ana apuba aitsüba den külemi tangsa tenaprongla chiokang, ta takhangba agütsü.

Congress lenir K.C. Venugopal-i lemsatepba osang Lok Sabha nung opposition lenir Rahul Gandhi-ia X ajanga lemsatepa, "Yimsü nung ajemdaker Chhattisgarh nung nun ana apubaji ochi temeden masü. Iba ya BJP-RSS-i tashiyim amshia yimsüsüba lir. Iba ya ajanga tatishitsü tamajung sayur. Parnok yimsüsüba kübok asalentong yanglur minorities anema inyaker," ta metetdaksü.

Paisa, "Onoki ola madoki malitsü. Yimsü temeden ya linük temzüng kübok temeden ka lir. Tangsa tenaprong chioktsü onoki akhanger," ta metetdaksü.

Wayanad MP, Priyanka Gandhi-ia, iba ya minority temeden anema inyakba lir, ta ashi.

Priyanka-i X ajanga, "Khristan nun ana-Sister Vandanha aser Sister Preethi na den tangartem apuba ya tamangba yimsü meyipdaksü

aser nisung shibelen ta tai tonglokja apuba lir. Iba ya minority nisungtem temeden anema inyakba lir," ta metetdaksü.

Hombarnü Parliament kima United Democratic Front (UDF) MP temia nun ana apuba anema longkak aita liasü.

Longkak aitba nungji shilem agir Alappuzha nungi MP K.C. Venugopal-i, Bajrang Dal züngsemtem aser Chhattisgarh police na senteper inyaker; iba ya ajanga BJP-i yimsü tsütsü nütsüng ajema alirtem anema inyakba nükjidong jangjar, ta ashi.

Sister Vandana Francis aser Sister Preethi naprongla ya Kerala nung aliba Assisi Sisters of Mary Immaculate (ASMI) nungi lir. July 26 nü tena Durg Railway Station nung apu. Tena den lanur tebur ka aser tetsür asem liasü. Parnok ajakji Narayanpur district nungi lir.

Right-wing züngsemtemi, nun ana jagi nisung shibelener aser tangartem Khristan yimsü dangi meyipdaksür, ta tai tongloktsüba sülen Chhattisgarh Police-i Bharatiya Nyaya Sanhita (BNS) aser Chhattisgarh Freedom of Religion Act, 1968 kübok tena anema ken o benok.



TIR YIMYIM YIMOBILEM (EDITORIAL)

DIMAPUR

SANGTENNÜ

CHITENI 29, 2025


Shibai artsü anüker ?

Nagaland o Assam na artsü kong lir aser shibai anüker (?) ta jembitsü kisüing atema Nagaland tatar senden balaka ayongzük langa tia tensa kati asenok menepogo. Iba jenjangji Nagaland state government nung mangatet tashi, Assam li tuluba akümtsü aser Nagaland tilaba akümtsü. Ibaji dang masü saka Nagaland asoshi shisabolutsü kaji, tang ama, Assam nung Bangladesh nungi arua temelaba melii Assam senso küma alitsü merangba purtem nütsüing lakh ta masü crore junga aridokba mapang, item nübortemji Assam nunga tali majung aser Bangladesh-ia meyipa moutet ta parnok jenokdak anasatiba aser temelatibaji Nagaland asütsü. Aji oda, metsütsüi Assam nungi aridokba bendangertemji Nagaland nung arua jenoktsü merangba tangua angur aser tangashia angashir. Atangji, iba osangji angashia Nagaland government-ia arsangokja mitkartem yoktsü renemba osanga angashiogo aser artsülen tesem balalai item mitkartemji yoker alitsü imlar. Ajisüaka, Assam o Nagaland na tsüingda artsülen tesem pezü pungoka nung Nagaland gate mashimashi ka yanglua alidak kisüing Nagaland mitkartem yoka nükdaktsüba jagi asen lima bendanger talidak maka nemzürtem ket nungi meküzmzüktettsü. Nagaland anüolen Assam den artsüsa aliba Mon, Longleng, Mokokchung, Wokha, Dimapur, Chumoukdima aser Niuland district-tem nung alirtemi balaka Assam len nungi bendangertem nungoka aitbaji metettsü. Ano, item district-tem rongnunga artsülen ali tsütsü Assam police-temi mapang mapang shia timtem agütsürtemji Mon, Mokokchung aser Wokha district nung alirtem ya asütsü. Aji oda, tanga Mokokchung district kübok Assam artsülenbo Assam Police Commando Training Center lapokba osang angashir. Iba denji medemdanga asen Nagaland government-ia ilenji artsü anüksü atema mitkartem (IRB) ayutsü asoshi tesembo mesemtetogo ta angashi saka tesem mesemtetba dak alaka mitkartembo yoka mali. Aji oda, tesüingmangtsü aser tejashitsü kaji, Nagaland government-i Naga nunger artsülen alir yimtaklirtem dang Nagaland mitkartem alitsü asoshi ki süjang, ajimesüra mitkartemji melitettsü ta ashiba osang angazüker. Aji shitak asünungbo, Nagaland artsü yabo Nagaland police-i masü saka yimtaklirtemi anüksüsa adoktsü. Atangji, alemli tsürabur mapang nungi pei yimer lushi pei yimertemi dang nüka kümzüka aru. Ajisüaka, tsürabur mapangji yimtsüing kaji tanü state ka amato liasü, anungji yimtsüing shia pei süngkümshi kübok pei yimten temzüing özüing lateta yimsüsüa aru. Ajisüaka, tanübo iba putu to süiogo ta Nagaland government-i metettsüla aser Nagaland artsü anüksüba mapa ya yimtaklir mesüra kaketshirtem mesüra lanurtem mapa mesüdaktsütsüla, kechiyong yangji asenok akoksatsüsa lendong lir. Ashiko, Nagaland -sa süaka Assam artsülen malirtemibo Assam government-i Assam police yoka Nagaland li rakzüksü merangba aser Assam len nungi Bangladesh nungertemi Nagaland-i aittsü merangba tensa tiaji süoki ia mebilemtsüa akok. Ano, asenoki angtettsüba kaji, Nagaland nungbo government meyong kiojen yanglua alidak tesemtem dak alaka state government li maka, anungji artsülen aliba liji yimtsüing ka indang mesüra nisung kar meyong lir. Ashiko, iba jagi aiben Nagaland government nung alirtemi Nagaland artsülen aliba li aser nübortem kümzüka ayutsübaji tangar asoshi inyaktür amai bilema alitsüa akok. Ibayongji, ashiko, artsü nung alir yimtaklirtem dang, parnok li kümzüksü asoshi sepaitem yoktsü alinung, parnok dang mitkartem alitsü asoshi ki yanglujang ta ashi asütsüa akok. Assam-bo government-i par litsü ajaklen tanüker mitkartem yoka anüker saka Nagaland-bo government-i masü ali kiburtem nem nungloka toktsür aser kaketshir aser lanurtem danga imlar. Aji oda, Nagaland government-ibo Nagaland artsü anüksüa nübortem dak dang imlara, Nagaland police-tem mapa ya kechi asütsü ? Shibai Nagaland anüker asütsü ? Asen state government-i Nagaland ajungtsü asoshi kechi mapa aser kechi tesem nungang temulung agütsür asütsü ? Ibai tetamatsü state ka lir !

OLEMSABANG

Kosen ayimdang kidang anepaluyim kar

Source - Internet



Kosen dang ya Epistaxis ta-a ajar aser iba ya teti ajuruba timtem ka lir, koba kidang first aid ajanga anepaluteter.

Teni nung nep kenshiba mesüra teni telonglen takong akümba ajanga kosen ayimer. Khen khenbo teni nungi nep asükdokba ajanga-a kosen ayimer.

Teni nung blood vessels aika aliba ajanga teni nungi azü melamela alur aser kosen ayimba timba ka teni tetenzüklen nungi alur aser minute ishika lir anener. Kosen ayimba aibenbo timtem tulu majurur.

Kosen yimdaktsübatem:

- # Teni kenshiba
- # Teni yiruba
- # Yimra agi atongdang
- # Oset tila agi teni nung kenshiba
- # Allergy
- # Teni telung nung tumor
- # Teni telung nung neptzü aser mopung lenmang akongba
- # Sinusitis
- # Asükwa asüba agi

Kidang anepalutsüyim kar:

- 1: Meti nung apple cider vinegar metenang aser teni anasa yuang. Iba ya janga azü ayimba ajema kümdaktsür.
- 2: Minute 5 nungi 10 shi teni temalen (tenük ana yongtsü) nung ice pack mesüra tzü temekong yuang. Iba ya ajanga blood vessels shibangtsür aser azü ayimba anendaktsüba den teni awakba ajema kümdaktsür.
- 3: Minute 5 nungi 10 shi nü kümtsütila aser temeyong agi teni shibangang aser nü tebang ajanga tango sashiang. Iba ajanga kosen ayimba anentsü akok.
- 4: Kosen tera dang yimra, tekolak tejaklen tera angümzüka lur indangindanga menang. Iba ajanga nü terokleni azü maitsü, kechiyong azü meyokba ajanga saktsünüa aitba timtem ajurutsü akok.
- 5: Nü temang nung Vitamin K meperii akümba ajanga kosen ayimtsü akok. Anungji, tarutsü nung kosen mayimtsü atema süngolio amala vitamin K aliba chiyongtsütem chiang.
- 6 : Kosen noktangtsü atema Vaseline amala moisturizing ointment mesüra antiseptic nasal cream teni telunglen nüang. Kosen ayimba anenba sülen ghonda 12 shi nep tashi agi tasükdok mesüra teni telung nung kecha teinok.
- 7: Nai apple, lasüing, watermelon & piyas nunger amala vitamin C aser flavonoids aliba chiyongtsütem aika achitsü merangang. Item ya ajanga capillaries tashi itdaktsür aser kosen ayimba nungi noktanger.
- 8 : Teni telunglen neptzü aser mopung lenmang takong akümba ajanga kosen ayimer. Anungji, anogoshia tzü aika jemang. Ano tzü temerük nung metsü tera enoker teni telunglen enokang, kechiyong iba ya ajanga teni telung nung neptzü aser mopung lenmang tai kümdaktsür.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Keswick Convention küm 150 ajungbamong amonger



Yaküm 'Keswick Convention' nung adenertem kar convention hall kima tangokba noksa nung angur.

July 28, 2025: Keswick Convention-i Khrista osangtajung tiyongtsü südaktsür alima nung temelenshi adokdaktsütsü atema inyaka aruba sülen taküm küm 150 ajunger. Taküm Keswick Convention omenji "Transformed" lir. Küm shia iba sentong ya England kübok Lake District nung amonger.

2025 Keswick Convention ya July 12 nungi August 1 tashi amongtsü aser hopta asem sentong nung tanur/lanur 3,500 densema nisung 14,000 dak temai shilem agitsü.

Iba Convention nung parnoki asentenshir Tsüngrem O proktsü, Khrista mesüka kümdaktsütsü atema inyaktsü aser mission wadang tuluba inyaktsü atema bangjemtsü.

Keswick Ministries nung Minister-at-Large, Rev. Jonathan Lamb-i, "Keswick ya taküm melenshidaktsüba aser

Boko Haram kiralongrartemi apuba putir ka den tetsür 10 chiok

July 28, 2025: Nigeria nung Boko Haram kiralongrartemi taoba ita tetenzüklen Khristan putir ka puer aoba sülen pa tepseter südi ta bilema liasü, ajisüaka Tsüngremi tamangertem sarasadem langzüa putirji chiokogo, ta osang ka ajanga metetdaktsü.

Christian Solidarity International (CSI) nung International Communications tongti, Joel Veldkamp-i, June 1, 2025 anogo nung arrshi küm 41 putir, Rev. Daniel Alphonsus Afina, Mubi nungi Maiduguri-i aoba mapang nung kiralongrartemi pa puer ogo, ta metetdakja liasü.

Veldkamp-isa, Rev. Daniel ya CSI indang partner ka lir, ta metetdaktsü.

"July 21 nü pa (Rev. Daniel) den külemi Boko Haram teloki tamalen pua aliba tetsür ter chiokogo. Tesüiba küm 15 tashi Islamic telok Boko Haram-i Nigeria nung Khristantem aika tepseta arudar," ta paisa metetdaktsü.

"Pa chiokba ya Tsüngremi asen sarasadem langzüba lir. Alima tesem balala nung tamangertemi pa atema sarasademja aruogo," ta pai metetdaktsü.

nisung ka taküm lenla ajak Khrista mesüka kümdaktsütsü atema lir, aser iba ya local Arogotem nung rangloker inyaker," ta ashi.

Christian Daily International den interview ka nung jembidang Rev. Lamb-i convention putiotsü, alima nung mission wadang tuluba atemzüka inyakba aser kanga kera melenshiba lima ka nung lanurtem dak rangloker inyakba indang lemsatapa liasü.

Paisa, taküm iba Convention omenji "transformation" lir, aser iba omen kübok Yisu Khrista ajuruba ajanga taküm melenshiba ajungkettsütsü atema lir, ta ashi.

Paisa, "Keswick tamendakdak ya Laishiba tesayuba nung ajemdaker lir aser mission indang tangatetba asemji- Tsüngrem O angashiba, Tsüngrem chir mesüka akümbe aser Tsüngremer mission

inyakba lir," ta metetdaktsü.

Paisa, "Tsüngrem O angashibaji Laishibai sayuba angatetba lir. Tsüngrem chir mesüka akümbaji ibaji ajanga lir. Nai Tsüngrem O angara aser Tsüngrem chir mesüka kümra nai Tsüngremer mission inyaktsüla," ta metetdaktsü.

Takümbo iba Convention nung tanurtem, lanurtem aser kaketshirtem aika adenba dang masü saka parnokia shilem agitsü.

Iba convention ya 1875 küm Keswick nung aliba Cumbrian jila nung tenzüka liasü, ajisüaka tanübo Pacific nungi East Asia tashi aser Africa nungi Caribbean tashi nung linük 15-16 nung Keswick dak sendakba sentong 90 dak tali agir aser item sentongtem nung nisung 60,000 dak tali ayimjemer, ta Rev. Lamb-i metetdaktsü.

Rev. Lamb-i, 2175 küm tashi nung Yisu alimai marui lira iba küm nungji Kswick Convention küm 300 ajungtsü, aser iba mapang nungjia Keswick-i maneni Khrista osangtajung sangdonga alitsü, ta ashi.

Ireland nung nisung meyrjang aika tenem kolaki tua tekülem agi



Tamangertem Croagh Patrick tenemi atudang tangokba noksa nung angur.

July 28, 2025: Amongnü (July 27) Ireland nung tamangertem aika Croagh Patrick tenem kolaki tua tekülem sentong agiogo; iba tenem dang ya 'Holy Mountain' taka ajar.

Küm shia Khristan 6,000 dak temai metre 765 talang Croagh Patrick tenem kolak jagi tua

ANOGO ABEN TSÜNGREM DEN

Khristan Tekülem Mathi 4:1-11

Yihuda nunger yimsü nung lenir tulu kati Yihuda nunger aser khristantem kasa tekülem nung tajangzüik anguba ajitetba ka yamai ashi: "Nisungi Tsüngrem indang bilema malitsü akok, saka Tsüngremi nisung atema kanga bilemstsür". Ibai bushitettsü tatempangba lemanji tekülembaji lir kechiaser tekülembaji taküm aliba leman ka lir. Tsüngrem tesangwa nung alimaji anguba leman ka.

Koba yimya nung chichiba Khristan tekülem yimyaji sayur? Putu ajak nung, mapa ana maneni külemi alir. Itemji sayutsüngiba aser oji angashiba, aser Kibuba Benjung agiba. Parnok inyakba yimya balala süaka, ka jembir aser ka mapa agi sayur, saka itemji mapabo kasadang. Anapronglai Khristai alangzüikba taochi osangtajung ain aser sentsüwangshi nung sangdonger.

Anungji ozüngji odang lir. "Nai Kibuba ne Tsüngrem külemang". Kechiba? Tekülemji Khristan kija takümi Tsüngrem yimli nung shilem agia adenba lir. O ka nung, yangi asen tekülemji, kotak nung külemba tashi mait ongmedang dang lir.

Itemi shisadangang: Tang nai Tsüngrem mebilemer mesüra shinga mebilemer ta bilemer asü? Iba tebilemstsü aneptsü asoshi nai kechi merangdanger? Tembartem den jembir asü? Counselors den jembir asü? Tsüngrem den jembitsü koda? Ne taküm nung tekülem nem mapang agüja ali asü mali?

Sarasadem: Kü tanela nok nungi kümzükan, kü taküm azü tashi nungi kümzükan. Molusongzü bang nungi kümzükan; arem nashi pungchi nungi Nai kümzükan.

Telangzüba: Aser tesüneptsüba Tsüngremi nenok tetsüng kübok Satan ajemshitsü.

'Khristan Teimla' liasü.

Catholic Arogo Jubilee küm nüngtem nung iba tenem kolaki aturtem nem 'Pilgrim Passports' agütsür, aser tenem kolak jagi atua shia 'stamp' khien ajenloktsütsü.

Ireland nung putirtemi tenem asem- Croagh Patrick, Lough Derg aser Knock ya temeshi aini aoba 'national pilgrimage sites' ta sangdongogo.

Tamangertem shirnoki tesem asempronglaji semdangdir parnok nem commemorative Jubilee Year medal kaka agütsütsü.

July 27 nü Tuam nung Archbishop Francis Duffy leniba nung tamangertem tenem kolak jagi tua liasü aser pa leniba nungsa tekülem sentong agi.

Amongnü anepdang 8:00 ako nungi nikongdang 2:00 ako tashi ghonda shia tekülem sentong kaka agia liasü aser Kibuba benjung nung amtsük 3,000 alem.

GOVERNMENT OF NAGALAND

STATE COUNCIL OF EDUCATIONAL RESEARCH AND TRAINING

NAGALAND: KOHIMA

NO.SCERT/NMMSS/04/2023

Dated: 28th July, 2025

National Means-Cum-Merit Scholarship Examination - 2026

Eligibility Criteria:Class8 regular students studying in Government Schools who have passed Class 7 with a minimum of 50% marks for ST/SC and 55% marks for General Categoryare eligible to appear for the NMMSS Examination 2026. Upon qualifying the examination, a scholarship amount of Rs.1,000/- per month will be awarded from Class 9 to 12.

Scheme		Date
NMMSS	Last date for submission of Application Form	30th August 2025
	Date of Examination	01st November 2025 (Saturday)

- The District Education Officer (District Nodal Officer for NMMSS) is requested to collect the NMMSS 2026 Application Form for their respective Districts from SCERT, Nagaland: Kohima.
- Application Form may be downloaded from SCERT, Nagaland website: <https://scert.nagaland.gov.in/> or collected from the DEO Office or from SCERT, Nagaland, Kohima.
- Application Forms must be submitted to the State Nodal Officer, NMMSS, SCERT, Nagaland: Kohima on or before 30th August, 2025.

(KEVIRALE-U KERHUO)
Director
SCERT, Nagaland: Kohima

GOVERNMENT OF NAGALAND

DIRECTORATE OF TECHNICAL EDUCATION

NAGALAND, KOHIMA

Kohima the 28th July 2025

NOTIFICATION

NO. DTE/ ESTT-2/7/2019-20/ This is to notify all the candidates who have applied for State Reserved Seats in under-graduate Engineering degree courses in (i) Agricultural Engineering (ii) Biotechnology (iii) Computer Science & Engineering (vi) Information Technology (v) Electronics & Communication Engineering (vi) Civil Engg. (vii) Mechanical Engg. & (viii) Food Technology (ix) Electrical Engineering at various Engineering colleges for 2025-26 academic session, that the provisional list of selected candidates have been uploaded in the Department website: www.dte.nagaland.gov.in.

Selected candidates are informed to submit their Acceptance Letter to the office of the under-signed on or before 2nd August, 2025 during office hours and counseling will be held on 4th August, 2025. Non submission of acceptance letter will be considered as declined of seat.

Counseling for the above courses will be held on the 4th August, 2025 at 11:00 am in the Conference Hall of Directorate of Technical Education, Kohima.

(Er. VIPULHOU LHOUNGU)
Director

MULUNGEN O

Arishir Ojala Mapumenla (93 running), (W/o Lt. Alemchiba Atsongchanger), Mokokchung Yim, akümlï wadang tempanger onok temulung zürepa alidang kija-kibong aser lokti kwinakadi tamang sarasadem den nübu, mapang, rongsen, aser shisatsü agi yaritepogo, nenok ajak dang tepangi meshitetha tepela tulu iba zülü tatsü ajanga lemsateper. Nenok mapa tajung Tsüngremi tali moajang ta ozü sarasadem.



~ Temeim Chirnurtem, Semchirtem & Kinungertem.

ZOUBA SEMCHIR
UNGMA VILLAGE, MOKOKCHUNG
TENÜNGSANG AGÜTSÜR

Nagaland University kübok 2025 küm Under Graduate tatidang agiba nung ozü nisung anati takok tulu anguba asoshi Zouba Semchir, Ungma kanga pelar aser item takok tajung angurtem nem tenüngsang tulu agütsür.

- Wt. Imlibenla Jamir**, Lt. N. Mangyangtemjen Jamir'er jalai Kohima Science College nungi B.Sc. Chemistry Department nung Gold Medalist takok jenjang angu.
- Wb. Imnamayu Jamir**, Wb.Tajenchiba Jamir'er jabasoi Fazl Ali College, Mokokchung nungi B.A. tatidang nung tematiba takok jenjang asembuba aser English nung Subject Topper takok jenjang angu.

Parnoki shisaliok bushiba mapa nung bendanga agüja kena maneni meranga inyakba kuli parnoki anguba takok tajung ajanga sayutetogo aser parnoki anguba takok agi ozü kin nümadangteter.

Zouba Semchir ajak tenüng nung nena nem tenüngsang tulu agütsür aser ano ya mezüng takok ser tarutsü nunga nenoki inyakba mapa ajak nung takok nguyonga oangma ta sarasadema moatsür.

Lanunungsang, Tatar.
Zouba Semchir, Ungma.

Supongmar, Tatar
Zouba Semchir, Ungma.

Thailand aser Cambodia ceasefire alitsü mulungtepogo

Putrajaya, Chiteni/July 28 (Agencies): Thailand aser Cambodia nati "immediate and unconditional" ceasefire aitsü mulungtepogo, koba arütsü nung anogo pongunü buba raraba angatetteptsü asoshi tongtipang telemtetba ka alitsü, ta Malaysia Ato Kilonser Anwar Ibrahim-i Hombarnü ashi.

Association of Southeast Asian Nations regional bloc indang tekolak ama iba senden nung Anwar mendenpuba liasü, aser temolungjang ajak rakpoka sensaksemba sülen akhi ama tensa dangi meyiptsü asoshi mera agitsü tangatettepa kati aru, ta pai ashi.

Cambodia Ato Kilonser Hun Manet aser Thailand Acting Prime Minister Phumtham Wechayachai nati Mongulbar ayatirm nungi tenzüka "immediate and unconditional ceasefire" alitsü mulungtepogo, ta Anwar-i joint statement ka zünga ashi.

"Tensa tajungba akumtsü aser yimjung aser security akhi ama alitsü asoshi ibai tongtipang mera mezüngbuba aitsü," ta Anwar-i ashi.

Arütsülen tensa tajungba akumtsü asoshi linük anaprong nungi mitkar aser ketdangsürtem senden amentsü, ta pai ashi. Malaysia, Cambodia aser Thailand indang foreign aser defense minister tem dang tesunep alitsü atema ceasefire mapa kuma inyaktsü aser achayangtsü atema mechanism tejangja yanglutsü

tuyuogo, ta paisa ashi. Hun Manet aser Phumtam nati iba senden nung lemtetba tenüngsang agütsü aser osangbener den senden amenba tatemi teka amtepa salema liasü.

Hun Manet-i linük ana tsüngta tesendaktep tekeraba nung akhi ama junga akumtsü imlar, aji asünung dang yimdaklir 300,000 shi pei kidangi meyipa shilangtettsü, ta ashi.

Thailand aser Cambodia tsüngta tamang katepa, temulung lemtepa aser amalitepa tejakleni aotsü asoshi mapangji ya lir, ta pai ashi.

Phumtham-i iba senden telemtetba ajanga Thailand-i tesunep pangzüng asoshi jangra aliba sayur ta ashi.

Taoba Brehostibarnü land mine ka arütsülen poka Thai sepai pongu yiruba sülen rara tenzüük. Rara tenzüükba atema linük kati ka aitsür, kong nisung 35 shi tepsetogo aser anatsülen nungi nisung 260,000 dak tema pei ki yutsür tesem balala nung jenoka liasü. Linük anaprongi pei-peï ambassadors meyipa aja aser Thailand-i Cambodia den arütsü ajanga senzüba tesem ajunga shibang.

Tsükchitep ali tashi linük kata dena shishilempatsü ken o mejembitsü, ta US Tir Donald Trump-i tekumdangtsü ashiba sülen Malaysia nung iba senden ya amen. Sangdong nung iba jembishinü nung US ya co-organizer lir ta ashi aser China

nungia shilem agi. Ghonda ana senden amenba nungya Malaysia nung China aser American ambassadors dena liasü.

Israel-i Gaza nung nisung 36 tepset, tenokdangba kar salar

Deir al-Balah, Chiteni/July 28 (Agencies): Gaza nung nisung meimchir tia tamajungba akumba ajanga Israel-i teyari agütsüba nokdanga aliba salar anogo ka lir iba territory tesem balala nung Israel-i amakba nung Palestine nunger 36 tepset, ta yangji aliba health ketdangsür temi ashir.

Asürtem rongnung kinü tanur ka dena lir, shiba tetsü ita tenet mashisa aliba Israel-i amakdang tepseter tepok nungi rangtetba lir, ta Nasser Hospital ajanga ashi.

Gaza nung Palestine nunger nem teyari agütsüba tajungba kumdaktsütsü mechi Gaza City, Deir al-Balah aser Muwasi nung anogoshia ghonda 10 military operations anena atatsü, ta Israel-i Deobarnü sangdong.

Israel-i humanitarian mera tasenba den külemi military operations maneni alitsü ta ashir. Anepdang 10:00 ako nungi nikongdang 8:00 ako tashi inyakyim anena atatsü Israel-i sangdonga aliba alemer tang tesüsa amakba atema Israel mitkari telangzüba agüja mali.

Aid agencies temi iba mera tasenba pelashishia agizüka lir, kong Gaza nung teyari osettem tayimtsü nungi tsükdaktsütsü dena lir, saka ajiaki Palestinian territory nung nüburtem yaseta

aliba meperitsü ta ashir.

Tanurtem takep agi teret meyibanga kongrar kanga lular aliba noksatem mechi Israel tembar linüktem densema alima tesem ajungalen nungi jashiba lemsatep. Item noksa ya ngua US Tir Donald Trump-ia kanga majung ta Deobarnü ashi.

Rara tepiyong Israel-i yimya balala nung teyari agütsüba nokdanga liasü. Hamas-i pua alirtem chiokdaktsütsü mechi March ita totzü, chiyongtsü aser mozü densema oset ajunga nokdanga liasü.

Israel-i item tenokdangba shilem kar May ita sala saka US-i yariba aid delivery system ka amshi, kong rongrongshirong aser azüdokshi agi sünger arur. Akhi mapang nungi teyari agütsür temia parnoki teyari agütsüba tesemtem nung iba mesük law and order raksaba ajuru.

Gaza nung nütsüng yongsük timba dangari teyari agütsüba nung metaloka alir. Chiyongtsü angutsü ya tebilemtsü tulu kumogo aser Palestine nunger karibo iba atema pei takum bendanga agütsür.

Central Gaza nung aliba Awda hospital ajanga ashiba agi, parnok dangi Palestine nunger nisung tasü mang tenet bener aru, shirnok US aser Israel nati yariba Gaza

Humanitarian Foundation ajanga lapoka aliba aid distribution site anasa Israel-i Hombarnü injang khaloktsüdang tepset. Iba anasa nisung 20 yiru ta mozüki ajanga ashi. GHF nungi telangzüba kecha agüja mali.

Gaza south tsütsü Khan Younis anüolen Muwasi area nung ki ka amakba nung dangar nisung 11 den mashisa tetsü aser tanur ya tepset, ta Palestinian Red Crescent ajanga lapoka aliba mozüki kati ashi.

Ano Khan Younis nungsa Japanese neighbourhood anüolen story ana aliba ki ka nung amakba nunga nisung 11 asü aser parnok tesadang dak tema tetsür aser tanur lir ta Nasser Hospital ajanga ashi. Ano Gaza tesem balala nung nisung pongu tepset ta ashir.

Hamas-i October 7, 2023 nü Israel south len arütsü alema aita amakba nung nisung 1,200 tepset aser nisung 251 pua bener ao. Pua bener aortem rongnung nisung 50 dak tema tang tashi par ket nung lir aser parnok ya tesadang dak tema süogo ta Israel nungeri amanger.

Israel-i meyiper tayang kepzüka amakba nung Palestine nunger 59,800 dak tema tepsetogo ta Gaza indang Health Ministry ajanga ashir.

England-i tetsür Euro asayamung kokogo



Chiteni/July 28, 2025 (Agencies): Deobarnü 2025 Women's Euro final nung penalty metsütepba sülen England-i goal 3-1 agi Spain koka iba asayamung anabenbuba atonga kokogo.

Asaya nung mapang apuloktsür asayaba sülena team anaprongla goal 1-1 dang idaktsüba sülen penalty asayatsüsa aküm aser England-i asaya koka 2023 World Cup final nung tamakok anguba mang yangogo. England tsürtem rongnungi forward Chloe Kelly-i goal tasembuba ya idakja liasü.

Basel kübok St Jakob-Park nung final asaya ya Spain-i amokbanger asaya aser asaya mezüngbuba shilem nung Mariona Caldentey-i goal ka tongokja parnok tejakdang liasü.

Quarter nung Sweden aser semi nung Italy mekoki aliba nungi meyipa tur akokba sülen final nunga England team tesülen liaka süngjemsüngjema dang asaya liasü.

Asaya nung ghonda ka ajungtsü lia England atema

Alessia Russo-ia goal ka idakja goal kasasa aküm aser iba sülen mapang apuloktsür asayaba tashi nung goal ka danga midaktsüba sülen penalty metsütepa liasü.

Spain asoshi kanga dang tejangshitsü asaya ka liasü kechiyong parnok rongnungi asayar aseme penalty meidaktsütet aser goal midaktsüba asayartem rongnung Ballon d'Or tesüsabuba ngur alila Aitana Bonmati-a densema liasü.

Sarina Wiegman-i aniba England team-i European champions anabenbuba atonga kokogo. Taoba asayamung nung parnoki Wembley nung mapa apuloktsür asayaba mapang Germany koka mezüngbuba tetsür asayamung tongtibang ka koka liasü.

Wiegman-i, European Championships ya asemenbuba atonga kokogo. 2017 küm la lenisüba nung lar linük Netherlands team-i European Championships akok aser iba sülen England team den iba asayamung anabuba atonga

kokogo.

Wiegman-i aniba team ya quarter nung Sweden den asayaba mapang goal 2-0 agi tesülen aliba nungi meyipa tur penalty nung asaya akok aser Italy den semifinal asayaba mapang substitute Michelle Agyemang-i minute 96buba nung equaliser idaktsüba sülen mapang apuloktsür asayaba mapang Kelly-i goal ka idakja parnoki asaya akok.

Asayamung tepeyong kanga jungabo masayaka England team-i metoktsüi kanga meranga asayaba ajanga takok ngutetogo.

Penalty metsütepba mapang England atema Beth Mead-i mezüngbuba metsüba penalty spain keeper-i nokdang aser captain Leah Williamson-i metsüba penalty-a Coll-i nokdanga liasü. Ajisüaka Alex Greenwood aser Niamh Charles napronglai goal idaktsü aser Kelly-i tasembuba penalty idakja parnoki asaya akok. Spain atema Patri Guizarro kija-i penalty idakja liasü.

Naomi Osaka aser coach Mouratoglou na pilaogo

Chiteni/July 28, 2025

(Agencies): Grand Slam pezü koker alila Naomi Osaka-i Hombarnü sangdong ka ajanga la aser coach Patrick Mouratoglou na pilaba sangdongogo. Tena küm ka majung inyakba sülen pilaogo.

Japan tsürta yagi France nunger coach ya taoba küm September ita la indang coach asütsü shim, shiba Grand Slam 23 koker alila Serena Williams indang coach liasü.

Jala asoba sülen Osaka 2023 küm metoktep aser pa küm ka tejakdang asaya tenzükshiba sülen junga masayateti arudar aser la tang jenjang 49buba nung lir.

Taküm la French Open nung mezüngbuba round nung tsük aser Wimbledon nung tasembuba round nung tsüka liasü.

La tatemsa Great Britain tsür Emma Raducanu-i Washington Open nung 6-4, 6-2 agi koka liasü. Tena tang mezüngbuba iba asayamung nung asayaogo. Osaka-i

Mouratoglou shimba mapang, pai la tenangzükba lima jagi anir aotsüta imla liasü, saka aji matalok aser tang tena pilaogo.

"Patrick kanga pelar..Na nungi aika angazükogo," ta taoba mapang world number one asayar yagi X ajanga lemsatet.

2025 küm Osaka-i junga masayateti arudar, saka la Auckland nung tanabuba jenjang nung tembang aser Saint-Malo nung WTA 125 (Challenger) asayamung nung mezüngbuba clay court asayamung ka koka liasü.

Mouratoglou den pilaba sülen Osaka-i la nem teyari agütsütsü atema nisung tasen ka shimtsü asü mapang tatsüka atema shinga meshimi asayatsü aji tang tashi mejangjai lir.

Osaka Hombarnü nungi tenzüka Montreal nung WTA 1000 asayamung nung shilem agidar. La mezüngbuba asaya world No. 515 Ariana Arseneault den asayatsü.

Al-Nassr-i Felix atema £43.7m agütsütsü mulunga agizükogo

Chiteni/July 28, 2025

(Agencies): Al-Nassr-i Chelsea forward Joao Felix atema pound million 43.7 agütsütsü mulunga agizükogo.

Tena ngzüktepbata tembanga yanglutsü atema arishi küm 25 tain asayar nem medical tetendangba agitsü asoshi Riyadh-i aotsü temelaba agütsüogo.

Saudi Pro League club Al-Nassr nung Felix ya külem Portugal nunger asayar Cristiano Ronaldo den longjemtsü. Pa Benfica nung oa asayatsü atema jembishinüa liasü saka Al-Nassr-i atsüa aruogo.

Chelsea-i taoba küm lemluwa Felix atema Atletico Madrid nem pound million 45 agütsüba meyipa nguogo. Pa ya loan taah pound million 5 yong ita trok atema January ita AC Milan-i loan nung yoka liasü.

Chelsea shirnoki iba ita Club World Cup kokogo,

parnoki goalkeeper Djordje Petrovic aser Kepa Arrizabalaga na aser winger Noni Madueke nunger yokogo.

Parnoki pound million 130 shi aazükogo aser ano forward Raheem Sterling, left-back Ben Chilwell, midfielder Renato Veiga aser striker Armando Broja nunger ajak ayoktsü lir.

Chelsea-i striker Liam Delap, winger Jamie Gittens aser forward Joao Pedro nunger pound million 212 intoka alizükogo aser midfielder Xavi Simons aser defender Jorrel Hato nunger alizüktsü tejangraba lir.

Ajisüaka parnok tang transfer balance ka asoshi Uefa-i nongshia arudar aser temzüng ozüng sülen anidaktsü nangzükteper pound million 27 senchi chiogo. Parnoki tashi mangara taruba season atema Champions League asoshi asayar tasen mezüngoksemtettsü.

Asia Cup: India aser Pakistan na Sept. 14 nü asayatsü

Chiteni/July 28, 2025

(Agencies): Asia Cup 2025 September 9 nungi 28 tashi UAE nung asayatsü jangjaogo. India aser Pakistan na mangatetep adoker aliba ajanga ken o mejangjai aruba sülen Asian Cricket Council (ACC) tir Mohsin Naqvi-i asayamung asayatsüba anogo social media ajanga Honibarnü sangdonga liasü.

India-i July 24 nü Dhaka nung ACC senden nung amentsü mulunga agizükba sülen TOI-i taoba mapang, team ti asayatsü aliba asayamung ya T20 format nung asayatsü ta sangdonger liasü.

Iba asayamung atema India aser Pakistan na Group A nung UAE aser Oman den ata

lir aser Group B nung Sri Lanka, Bangladesh, Afghanistan, aser Hong Kong lir.

Honibarnü nikongtsütsü ACC-i sangdong ka ajanga ashiba agi, "ACC asayamung nung ajaki yongya ataba India aser Pakistan na asaya September 14 nü asayatsü."

Team ana ya iba asayamung nung asemen asayatsü akok. Mezüngbuba group stage (Sept 14) nung, iba sülen Super 4 stage (Sept 21) aser September 28 nü final nunga asayatsü akok.

ACC-i asayamung mapanglem ajak sangdongogo. Asayamung ya September 9 nü Afghanistan aser Hong Kong na asaya-a tenzüktsü aser September 22 aser 27 ta anogo ana anisüngzükba anogo ama

lateta yuogo.

India aser Pakistan na asayatsü atema India sorkari temelaba agütsüogo ta amanger. Pakistan sorkar inyakyim anemaka sorkari saisapong nungbo mekongshidaktsütsü telemtetba ka agir ama reprangteter. India nung Commonwealth Games (2030), Asian Games (2034), aser Olympics (2036) ayongzüka asayatsü tebilemba lir asünung intrnational asayamungtem atema tenokdangba tali magütsütsü merangdar.

Dubai aser Abu Dhabi nung asaya ajak asayatsü. Asayamung nung team ti asaya 19 asayatsü aser September 28 nü final asaya-a tembangtsü.

BILEMDANGANG

"Shisabulu agi nisung ka atsüngzükdaksür."